



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Broj: 01-GV-02-497/24
Sarajevo, 27.03.2024. godine

Na osnovu člana 31. stav (1) tačka b) i člana 77. stav (1) Statuta Grada Sarajeva („Službene novine Kantona Sarajevo”, broj 7/23), Gradsko vijeće Grada Sarajeva, na 38. sjednici održanoj dana 27.03.2024. godine, primilo je k znanju

Informaciju o realizaciji Javnog dočeka Nove 2024. godine.

PREDSJEDAVALAČI GRADSKOG VIJEĆA

Jasmin Ademović, s.r.

Adresa: Hamdije Kreševljakovića 3
71 000 Sarajevo
Tel.: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba





Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNICA

*Informacija
o realizaciji Javnog dočeka Nove 2024. godine*

Sarajevo, mart 2024. godine

Adresa: Hamdije Kreševljakovića 3
71 000 Sarajevo
Tel.: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



Informacija o realizaciji Javnog dočeka Nove 2024. godine

Strategijom razvoja Grada Sarajeva 2021.-2027., u okviru strateškog cilja 5. GRAD HILJADU MOSTOVA, jedan od prioriteta je pozicioniranje Sarajeva kao novogodišnjeg centra regije.

U Budžetu Grada Sarajeva za 2023. godinu (Službene novine Kantona Sarajevo, broj 2/23 i 46/23), za doček Nove godine planiran je iznos od 500.000,00 KM, od čega je 300.000,00 KM budžetskih sredstava, a 200.000,00 KM iz transfera (općine, Turistička zajednica).

Ugovorom o sufinansiranju projekta Organizacija dočeka Nove 2024. godine, između Turističke zajednice Kantona Sarajevo i Grada Sarajeva, definiran je iznos od 150.000,00 KM. Prva tranša u iznosu od 75.000,00 KM uplaćena je krajem 2023. godine, a druga tranša u istom iznosu trebala bi biti uplaćena u budžet Grada Sarajeva nakon što se ovjeri pravdanje sredstava iz prve tranše. Izvještaj o utrošku sredstava iz prve tranše dostavljen je Turističkoj zajednici Kantona Sarajevo te se očekuje uplata druge tranše u iznosu od 75.000,00 KM.

Sporazumi o sufinansiranju Javnog dočeka Nove 2024. godine potpisani su s četiri gradske općine u sljedećim iznosima:

- Općina Stari Grad Sarajevo u iznosu od 10.000,00 KM,
- Općina Centar Sarajevo u iznosu od 20.000,00 KM,
- Općina Novo Sarajevo u iznosu od 15.000,00 KM,
- Općina Novi Grad Sarajevo u iznosu od 10.000,00 KM.

Grad Sarajevo je po prvi put objavio javni poziv za potencijalne sponzore Javnog dočeka Nove godine. Na web stranici Grada Sarajeva i u dnevним novinama Dnevni avaz i Oslobođenje, 03.10.2023. godine objavljen je Javni poziv za sponzorstvo Javnog dočeka Nove 2024. godine u Sarajevu. Zainteresovani pravni subjekti sa sjedištem u Bosni i Hercegovini pozvani su da dostave Pismo namjere za sponzorstvo Javnog doček Nove 2024. godine u Sarajevu i zaključivanje sponzorskog aranžmana s Gradom Sarajevom.

Na Javni poziv prijavile su se:

- NLB Banka d.d. Sarajevo s ponuđenim sponzorstvom u iznosu od 100.001,00 KM,
- BASH A.W.G. d.o.o. Sarajevo, s ponuđenim sponzorstvom u iznosu od 10.000,00 KM.

U skladu s propozicijama iz Javnog poziva, NLB Banka d.d. Sarajevo s ponuđenim iznosom bila je Generalni sponzor, jer je ponudila najviši novčani iznos. BASH A.W.G. d.o.o. Sarajevo s ponuđenim novčanim iznosom spada u kategoriju Sponzora.

Gradsko vijeće Grada Sarajeva na 33. sjednici, održanoj dana 29.11.2023. godine, usvojilo je inicijativu, broj: 01-GV-02-1738-7/23, kojom se zadužuje gradonačelnica Grada Sarajeva da u okviru Javnog dočeka Nove 2024. godine po prvi put osigura održavanje koncerta Sarajevske filharmonije na način da ga pored gledalaca u dvorani, audio i vizualno mogu pratiti građani koji će se nalaziti ispred Narodnog pozorišta i Titovoj ulici. Gradsko vijeće predložilo je da se sredstva osiguraju iz Budžeta Grada Sarajeva i od sponzorstva.

U cilju realizacije navedenog, zaključen je aneks Ugovora o generalnom sponzorstvu s NLB bankom kojim je definiran da će od 100.001,00 KM iznosa generalnog sponzorstva, iznos od

49.878,80 KM biti usmjeren za organizaciju koncerta Sarajevske filharmonije na način kako je to Gradsko vijeće predložilo.

Pripremne aktivnosti na organizaciji Javnog dočeka Nove 2024. godine započete su u februaru 2023. godine. Izvršeno je istraživanje tržišta u smislu ispitivanja zainteresiranosti potencijalnih izvođača i procjene troškova organizacije. Tom prilikom nastojali su se osigurati renomirani bh. izvođači koji uživaju popularnost u BiH i regiji.

S ciljem realizacije pripremnih aktivnosti, formiran je Izvršni odbor za organizaciju Javnog dočeka Nove 2024. godine u gradu Sarajevu koji je održao pet radnih sjednica.

U radu Izvršnog odbora učestvovali su predstavnici Vlade Kantona Sarajevo, Ministarstva unutrašnjih poslova KS, Turističke zajednice Kantona Sarajevo, Grada Sarajevo, četiri gradske općine, tehnički organizator javnog dočeka, te predstavnici KJKP „Rad“, KJKP „Park“, KU Civilne zaštite, GRAS-a i Centrotransa.

Izvršni odbor je vršio tehničke poslove na pripremi i organizaciji Javnog dočeka Nove 2024. godine, a naročito: utvrđivanje i realizacija operativnih zadataka, davanje smjernica za njihovu realizaciju, vršenje procjene potrebe preduzimanja svih neophodnih aktivnosti i s tim u vezi provođenja adekvatnih postupaka u cilju uspješne realizacije Javnog dočeka Nove 2024. godine u gradu Sarajevu.

U skladu sa zaključcima Izvršnog odbora, kao i ukazanim potrebama, Grad Sarajevo je, u skladu s podnesenim zahtjevima, ishodovao sve potrebne saglasnosti i dozvole za organizaciju Javnog dočeka Nove 2024. godine na prostoru ispred Vječne vatre.

Izvršni odbor obavljao je operativne zadatke, te je s tim u vezi uspješno realiziran Javni doček Nove 2024. godine kojem je prema procjenama MUP-a KS prisustvovalo oko 30.000 posjetilaca.

Ugovor o organizaciji Javnog dočeka Nove 2024. godine zaključen je između Grada Sarajeva i PAL-e D.O.O. Sarajevo – tehničkim organizatorom Javnog dočeka Nove 2024. godine, broj: 01/14-11-7716-9/23 od 22.12.2023. godine, u iznosu od 475.400,67 KM bez PDV. Ugovor je zaključen u skladu sa Zakonom o javnim nabavkama BiH („Službeni glasnik BiH“, br. 39/14 i 59/22).

Novogodišnji program započeo je u 19:30 sati koncertom Sarajevske filharmonije, a koji je bio prenošen putem led ekrana ispred Narodnog pozorišta Sarajevo i Vječne vatre. Od 21:00 sat na sceni ispred Vječne vatre, Novogodišnji doček počeo je nastupom Lake, a nakon toga nastupali su Bombaj štampa, Zabranjeno pušenje i Crvena jabuka sve do 02:00 sata iza ponoći. Animatori Novogodišnjeg dočeka bili su Zenit Dozić i Aida Bukva, koji su osmislili scenarij Novogodišnjeg dočeka pod nazivom *Sarajevska priča*. FTV je prenosila javni doček i omogućila i drugim TV stanicama da preuzmu signal od 23:30. do 01:30.

Ova Nova godina bila je jedinstvena po nekoliko sadržaja. Po prvi put novogodišnji koncert Sarajevske filharmonije mogao se pratiti na otvorenom, ispred Narodnog pozorišta i u Titovoj ulici. Nadalje, po prvi put nastupila su čak četiri glavna izvođača. Do sada je bilo pravilo da nastupi predgrupa i glavni izvođač. Po prvi put su bili animatori, glumci koji su osmislili scenarij, vodili program i svojim skečevima kreirali dobru atmosferu i raspoloženje kod publike i TV gledalaca. Po prvi put unaprijed su snimljeni skečevi koji su emitovani u

blokovima između nastupa bendova na ukupno šest velikih ekrana u Titovoj ulici. Također, prvi put je iza ponoći izvedena pjesma „Sarajevo ljubavi moja”, a ideja je da to postane tradicionalan sadržaj, kao što je to i odbrojavanje pred Novu godinu. Također, po prvi put nije se desio vatromet u ponoć, nego su ispaljene konfete koje su doprinijele završnom doživljaju ulaska u Novu 2024. godinu.

Javni doček Nove 2024. godine prošao je bez ijednog incidenta, a sve gradske saobraćajnice su do 05:00 sati 01.01.2024. godine bile očišćene.

Također, u skladu sa zahtjevima Ministarstva unutrašnjih poslova KS, osigurano je prisustvo ekipa Hitne pomoći i Profesionalne vatrogasne brigade.

Kao rezultat dobre saradnje predstavnika Grada i Kantona Sarajevo, osiguran je produžen i besplatan tramvajski i trolejbusni prijevoz u novogodišnjoj noći od strane Centrotransa i GRAS-a.

Gradonačelnica Sarajeva je u Novogodišnjoj noći obišla dežurne ekipe u Profesionalnoj vatrogasnoj brigadi, Zavodu za hitnu medicinsku pomoć, Saobraćajnoj policiji KS, Policijskoj upravi Centar, JU Apotekama Sarajevo, kao i prvu bebu rođenu u Novoj 2024. godini.

Nadležna služba prikuplja podatke o ekonomskim efektima Javnog dočeka Nove godine kako bi se procijenila isplativost uloženog novca. Za sada su dobiveni uporedni podaci Turističke zajednice Kantona Sarajevo u kojim se navodi da je u periodu od 29.12.2023. godine do 02.01.2024. godine za 20,1% veći broj dolazaka turista u odnosu na isti period prošle godine. Što se tiče turističkih noćenja, ove godine je taj broj veći za 43,5% u odnosu na isti period prošle godine. Navedeni podaci su rekordni u odnosu na sve dosadašnje podatke koji se bilježe od 2019. godine.